

Da Urtijëi a Greding

La Lia Guanc dala gherdëina à fat pea pra l' "Marcia dla Trohtes" a Greding tl Bayern, ulache la trohtes de Gherdëina à fat na gran paruda



La Lia Guanc dala gherdëina de Urtijëi à n ucajon dl "Marcia dla Trohtes" a Greding tl Bayern mustrà la bela trohtes de nosta valeda.

Jites - La Lia Guanc dala Gherdëina de Urtijëi ie unida nvieda chëst ann a fé pea pra l' "Marcia dla Trohtes" tradiziunel ai 5 y 6 de setëmbër a Greding tl Bayern. Greding ie na pitla zità de setmìle abitanc danter Minca y Nürnberg, ulache l' vën metù a jì bele da vintedoi ani incà, for tla primà fina dl'ena de setëmbër, n marcià cun dut chël che à da n fé cun la trohtes. Sun nuvanta stonc vëniel fat y prejentà cosses che n adrova pra la trohtes dla region dl Bayern: l' vën mustrà coche n fej zandli cun la mazëtes sun l' puntl y nce d'otra sortes de zandli, laurà ora cioi de pel cun plumes de pavon, vendù drapesc de sëida,

bambesc y lin, ciamëjjes, ciauzei, joches, tascos, butons d'uni sort, pintes, ciauzes, fazulëc, libri n con' dla trohtes y mo d'otra cosses.

I guanc dala gherdëina desferënc ie unii prejentei da Carla Kasslatte te cater ucajons de sada y de dumënia, per ti lascé pro ai vijitadëures de cunëscer la particulariteies de nosc guanc y de nosta tradiziuns. Sëuraprò pitova i cumëmbri dla Lia sun n stont aposta vin y ciociu dl Südtirol y spartiva ora pruspec de Gherdëina.

Manteni l vedl savëi

Chëi che à metù a jì chësc marcià ulëssa fé cunëscer y manteni l vedl

savëi n con' de co se furnì cun la trohtes dl Bayern y fé cunëscer nce trohtes de d'utri raions. Ora che la trohtes dl Bayern y chëles de Gherdëina iel pra chësc marcià nce unì prejentà la trohtes y na Mujiga dala region de Limousin tla Franzia.

Drët blòta ie la vedla tradizion pra chësc marcià che à l inuem de "Rumlumpen": la sada sëira s'anconta la jënt de Greding y i vijitadëures dl marcià tla ustaries dla zità per s'la dé bona. Grupes desferëntes de sunadëures va da ustaria a ustaria a suné y a fé na bela atmosfera de festa.

A chëi che à metù a jì y a chëi che vën a ti cialé al marcià, che fova de ndut 12.000 persones, ti à

i guanc dala gherdëina plajù dassënn. Èi fova scialdi cuntënc che la Lia Guanc dala gherdëina de Urtijëi à fat pea pra l marcià.

Per i vint cumëmbri dla Lia che ie jic a fé chësc viac iel stat scialdi

nteressant a udëi tan de trohtes desferëntes y cunëscer mpue' miec chësta blòta zità dl Bayern.

Per la Lia Guanc dala gherdëina
- Urtijëi, Patrizia Crepaz

